

Friehlingserwache

Omm letzde Sunndaach omm Stommdisch hawwe merr driwwer geredd, ob merr uns ebbes ferrs neie Johr vorgenumme hawwe unn ob ooner von uns vorhott, e Reis odder e Tuursche ze mache, mett de Kameradschaft odder mettem Verein odder so.

Was willsde derr vornomme, hott de Karl gesaat, jetz wo alles deierer werdd misse merr erst emol abwarte, was dess alles kost, unn dann erst kenne merr Plän mache.

Ich saach: Ess iss wirklich wohr. Dess Audofahrn werdd deierer, weil de neie Sprit mett dem Etanol doodroi dess Super deierer mächt, aach die Versicherunge kosde mehr, vom Gas unn Strom unn was waaß ich nitt all garnit ze redde. All brauche se Geld unn von wem solles numme? Von uns, von de zwonsisch Millione Rentner.

Doo moont de Schorsch: Die spinne doch.

Wer spinnt, frächt de Karl, die Politiker?

Naa, gibt de Schorsch ze Antwort, die Dauwe.

Ich habb de Kopp geschittelt unn gefroocht: Die Dauwe spinne? Ei wie kimmsde dann doo druff?

De Schorsch hott gegrinst. Ess iss doch noch kalt drauße unn was glaabder, beim Nochber uffem Dach hawwe gestern de gonze Daach iwwer die Dauwe geruucksert unn sinn sich uffem Dachfirst alls hinnenooch geloffe. Bei dene iss schunn Friehlingserwache. Also Schorsch, hott de Karl gesaat, mir hawwes vom Fortfahrn unn dass alles deierer werdd unn du fängst von de Dauwe oo.

Doo moont de Schorsch: Weil ferr mich dess alles zesommehängt. Was glaabder wenss e bissi wärmer werdd, wenn die Omsele singe, die Schwalwe widder doo sinn unn die Osterglocke erauskumme, dann bisde doch enn gonz onnern Kerl. Doo willsde nimmi dehoom erumhocke, doo willsde enaus in die Nadur unn aach wo gonz onnerst hie, in die Palz villeicht odder onn die Nordsee, dess moon ich, unn weil mir jetz all noch koo Lust ferr so was hawwe weil de Winder nitt nor drauße vorm Haus, naa, aach noch in uns selbst droi iss doo kimmts oom vor, dass die Dauwe uffem Nochber soim Dach halt spinne dun.

De Karl hott de erst mich unn dann de Schorsch oogeguckt unn dann gesaat: Recht hotter, de Schorsch, aach wenn dess mett dene Dauwe arsch weit hergeholt iss. Unser Stimmung iss halt von de Jahreszeide abhängig.

Ich saach: Merr misst emol driwwer noochdenke, warum merr sichs eichenlich oodut, soi Haus, soi Verwondschaft unn soi Freunde e Zeitlong uffzegewwe, um sich innerer fremd Eck von Deutschland odder von de Welt uffzehalle.

Dess kann ich derr saache, moont de Schorsch, solong merr uff Reise gehe dut iss merr noch neigierisch. will ebbes onnerst sehe unn heern, will onnern Leit treffe, mol was onnerst esse unn drinke unn nodierlich onnern Geechende kennelerne. Ich denk, ess iss nitt schlecht, wenn aach so ältere Leit wie mir noch neigirisch sinn unn was unnerne-me wolle. Also ich wart uffs Friehlingserwache, was die Dauwe jetz schunn spinne lässt. Was hotters dann als von de Dauwe?, hott de Karl mich gefroocht, villeicht weeche dem Ruucksern?

Ich saach: Ich glaabs aach. Awwer saach emol, Schorsch, wie kimmsden dann uffem Nochber soi Dach?

Eiern Honnes